

Barclamiu Peder, Panaduz



L'annunzia da mort per Barclamiu Peder entscheiva culs plaids: «Suerter ina veta cumplenida rehamein ha Dieus priu si el tier el». Pli bein san ins daveras buca scriver per el.

Derivonza e clamada

Ils 5 d'uost 1904 ei Barclamiu nascius a Selva/Tujetsch. Leu passenta el ses onns d'affonza. Gia baul sededesta el svegliau mattatsch il gavisch da daventar scolast. Igl onn 1925 acquista el cun success a Cuera la patenta da scolast. Igl atun dil medem onn entscheiva el siu pensum sco scolast e concludea quel la stad 1972. 47 onns ha il trapassau dau

scola. Ils emprems tredisch onns instruescha el alla scola cumplexiva da Rueras. Il menar ina tala scola ei in pensum delicat – surtut cun in grond diember da scolars – ensiara denton igl avantatg, ch'il magister empren d'enconuscher tut ils scalems. Igl onn 1938 s'engascha Barclamiu Peder alla scola inferiura a Panaduz, nua ch'el resta fideivels tochen sia pensiun, e nua ch'el ha per propri adempliu il pensum da sia veta. Treis onns sur la vegliadetgna da pensiun ora ha nies prezaiu collega instruiu cun grond engaschi ils scolars dalla emprema classa. El empeila ils pignets cun bia pazienza e bien success egl art da leger e scriver. Barclamiu ei staus in scolast predestinat, e tgi che ha enconuschiu el sa ch'el ha adina anflau gronda contentientscha en sia clamada. Cun mintga caschun raquintava el bugen leghers schabets ord sia activitat da scolast.

Dirigent ed organist

Sper siu cunsociuns pensum da magister ha Barclamiu acquistau zun gronds merets sco dirigent dil chor-baselgia e leutier sco organist. Gia a Rueras surdat ins ad el la bitgetta dil chor-baselgia. Quei uffeci d'honor ademplescha el cun plascher ed idealissem tochen 1936, per lu surprender il pensum d'organist a Sedrun. Cun l'elecziun a Panaduz s'oblighe-scha Barclamiu da surprender la direcziun dil chor-baselgia ed il survetsch d'organist. Quels pensums fu-

van da gliez temps aunc bia pli pesonts. Dumengias e firaus era il chor obligaus da cantar messa. Dumengia suentermiezdi fuv'ei viaspars e la sera savens ina devoziun. Igl organist era adina presents. E lu astg'ins buca emblidar che la baselgia fuva da lezzas uras scaldada nuotzun u mo malamein. Per pign honorar ha il trapassau adempliu quels uffecis tochen 1964.

En renconuschiantscha da ses gronds merets numna il chor-baselgia siu premurau menader sco dirigent d'honor, e da Pastgas 1979 surdat sur plevon Herger ad el en num dalla pleiv la medaglia papala «Bene merenti». Ina undraziun veramein meritada.

Engaschi per la communatad

Tier scola e baselgia s'occupescha nies bien collega era pils fatgs da ses vischins. Nus anflein el denter ils fundaturs dalla Cassa Raiffeisen, ch'el administrescha duront 33 onns fideivlamein. Per biars convischins eis el staus in prudent cussigliader en caussas finanzialas.

La famiglia

Siu refugi preferiu sper l'immenza lavur fuva sia prezziada famiglia. Igl onn 1936 marida Barclamiu la giuvna Luisa Schatz, da Cazas. El ei staus per ella in fideivel consort ed a ses tschun affons in bab plein quita e premura. Daveras ina veta cumplenida. La pagaglia per ses gronds merets vegn el a retscheiver en l'auter mund. A nus resta Barclamiu en buna memoria sco survetscheivel e car concarstgaun. Dieus detti ad el la pasch perpetna!

Niclò Dedual